

傳6005

843


10/11

12

Kodak Color Control Patches

0 10 20 30 40 50 60 70 80 90 100 110 120 130 140 150 160 170 180 190

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32



韓文類譜卷第四

韓子年譜

起貞元十五年止二十年

丹陽洪 興祖 慶善

十五年己卯秋為徐州節度推官

董晉行狀云十五年二月三日丞相薨公之
將薨命其子三日斂既斂而行於行之四日
汴州亂汴州詩云健兒爭誘殺留後又曰母
從子走者為誰大夫夫人留後兒時陸長源
為御史大夫知留後事長源欲峻法繩驕兵
為晉所持不克行晉卒軍亂殺長源孟叔度

丘穎公從晉喪以出而汴州亂公義當從喪
又知汴必亂故去之爾此日足可惜贈張籍
云州家舉進士選試繆所當馳辭對我策章
句何煒煌聞子高第日正從相公喪公去年
領進士試而籍預選故籍祭公詩云北游偶
逢公盛語相稱明公領試士司首薦到上京
一來遂登科不見苦貢場唐諱行錄云籍貞
元十五年擢進士第也公詩又云夜聞汴州
亂繞壁行傍徨我時留妻子倉卒不及將俄
有東來說我家免罹殃乘船下汴水東去趨

彭城時公妻子自汴之徐也從喪朝至洛旋
走不及停假道經盟津出入行澗岡甲午憇
時門臨泉窺鬪龍是年二月乙亥朔甲午二
十日也行行二月暮乃及徐南疆僕射南陽
公宅我睢水陽即與東野書云主人與余有
故居余符離睢上者南陽公張建封也符離
舊隸徐州公答李翱書云僕之家本窮空重
遇攻劫謂汴州亂時又云其所以止而不去
者以其心誠有愛於僕也謂建封也公行狀
云武寧張建封奏爲節度推官得試太常寺

協律郎九月一日上建封書論晨入夜歸事
其後有諫擊毬書及詩舊史云發言真率無
所畏忌操行堅正拙於世務公豈拙於世務
者特不能取容於俗耳

或云公諫擊毬詩云新秋朝涼未見日
公早結束來何爲而論晨入夜歸書在
九月不當云其後也余默默念之後見
唐本乃作新雨朝涼未見日新雨字本
史記日者傳與山石詩所謂升堂坐階
新雨定同義也以是知諫擊毬之爲第

二書蓋畱也洪本亦只作新秋蓋洪亦
未嘗考及此也

歐陽生哀詞云十五年冬余以徐州從事朝正
于京師詹爲國子助教將率其徒伏闕下舉
余爲博士會監有獄不果上答張徹云及去
事戎轡謂入武寧幕也畢事驅傳馬謂明年
朝正而歸也徐泗豪節度掌書記廳石記云
南陽公自御史大夫豪壽廬三州觀察使授
節移鎮徐州歷十一年建封自貞元四年牧
徐至此首尾十二年唐地理志云濠初作豪

元和三年刺史崔公表請其事由是改爲濠
取水名也退之作記時尚爲豪或作濠誤矣
按杜佑通典濠州本鍾離郡隋改曰濠
州因濠水爲名音豪煬帝復置鍾離郡
唐武德八年爲濠州佑上通典在貞元
十年則濠本不爲豪洪蓋爲地里志所
誤爾
是年有崔翰墓誌記云南陽公文章稱天下
按史云建封能辨論禮賢下士有文章傳于
時也

十六年庚辰

與東野書云去年春脫汴州之亂遂來于此
及秋將辭去因被留以職事默默在此一年
矣歸彭城詩朝正回徐作也云天下兵又動
謂十五年秋令諸道兵討吳少誠前年關中
旱謂十四年冬京師饑去年東郡水謂十五
年秋鄭滑大水齟齬詩云河堤決東郡老弱
隨驚湍即此也鄭滑水見於舊史新史紀志
皆不書夏五月題下邳李生壁云余黜於徐
州將西居於洛陽汎舟清泠池泊於文雅臺

下西望商州東望脩竹園入微子廟求鄒陽
枚叔司馬相如之故文按公將西居于洛則
下邳當作下邳下邳貞觀中屬泗元和中屬
徐商州一作商丘是也公黜於徐蓋以諛言
無所忌雖建封之知己亦不能容也是年五
月十三日庚戌建封卒十五日壬子徐軍亂
公以十四日題李生壁則建封未死時已去
徐矣

按本紀云五月壬子建封卒

去夏贈張籍詩云李翱觀濤江今夏遊微子

廟而翱在焉蓋公春末與東野書云習之娶
吾亡兄之女期在後月則翱今夏已從公於
下邳矣亡兄即弁也公在洛中與衛中行大
受書曰足下喜吾復脫禍亂不當安安而居
徐徐而來也白樂天哀二良文云隴西薨浹
辰而師亂南陽薨翌日而難作初公從晉喪
至偃師而汴軍始亂及建封卒徐軍亂而公
已去徐故云復脫禍亂也送僧澄觀詩唐本
注云十六年詩云洛陽窮秋厭窮獨即今年
秋也

公是冬如京師縣齋有懷詩所謂求官
去東洛犯雪過西華乃此時也公河之
水詩亦今年作故曰我徂京師不遠而
還是也

十七年辛巳

公今年在京師有將歸贈孟東野房蜀客詩
云倏忽十六年終朝苦寒飢公自貞元二年至
京師今來從調選前後十六年諱行錄云房
次卿字蜀客房武墓誌云男次卿有大才公
祭房君文云五官蜀客即次卿也與汝州盧

郎中薦侯喜狀云去年愈從調選本欲携持
同行及春末自京還怪其久絕消息五月初
至此自言爲閣下所知撫言云貞元十八年
權德輿主文陸儔負外通榜帖韓文公薦十
人上四人曰侯喜侯雲長劉述古韋紆其次
六人沈杞張茲尉遲汾李紳張俊餘李翊而
權公三榜共放六人茲紳俊餘不出五年之
外皆捷矣公薦侯喜於盧陸當在今年或明
年也本集韋紆作韋羣玉俊餘作後餘是年
有李楚金墓誌

按公薦侯喜於盧汝州實在今歲之秋
盧汝州盧虔也喜嘗為盧作復黃陂記
見歐公集古錄公今年三月自京還夏
秋居于洛喜五月至洛七月二十二日
與公釣魚溫水洛北惠林寺有題名尚
存其薦喜於盧蓋是秋也薦於陸倕恐
在來歲之首唐制取士雖柄文專於禮
侍然叅佐差擇亦勅下乃定公上陸書
云執事之與司貢士相知誠深矣考其
時似已拜命矣張俊餘唐科第錄諸本

皆作後餘撫言誤矣韋羣玉韋珩也撫
言作紆亦誤公書曰羣玉京兆之從子
也京兆指韋夏卿也夏卿之弟正卿之
子曰珩曰瓘柳子厚有寄珩詩云回眸
炫晃別羣玉獨赴異域穿蓬蒿羣玉蓋
珩之字也公豈有所避而以字行耶珩
亦二十一年進士

十八年壬午調授國子四門博士

是年二月有送陸欽州序時公在京師縣齋
有懷詩云兩府變炎涼三年就休假求官去

東洛犯雪經西華塵埃紫陌春風雨靈臺夜
公歷佐汴徐二府以十六年休居于洛往來
京師者三年於今矣求官去東洛言自洛來
京師也撫言云崔羣佐宣州幕愈與羣論交
書云僕自少至今從事於往還朋友間一十
七年自貞元二年至今十七年又云僕無以
自全活者從一官於此轉困窮其謂為四門
博士即答張徹云省選逮投足也又云洛邑
得休告華山窮絕陁倚巖睨海浪引袖拂天
星磴蘚澹拳局梯飈飈伶俜悔狂已齧指垂

誠仍鐫銘公為博士後謁告歸洛因遊華山
但不知在今年或明年爾

按公除四門博士當在去歲之秋或冬
首也洪樊二譜皆以為今年誤也公貞
元十九年上京兆尹李寶書首云將仕
郎前守四門博士是上書之日官已滿
矣唐制博士皆二年滿施士句由四門
助教至為太學博士秩滿當去諸生輒
留公今年與崔羣書亦曰官滿便終老
嵩下以滿日計之當自十七年始也又

公論停選舉狀曰臣雖非朝官月受俸
錢停選舉在十九年七月是公是月猶
在職也而公與李實書曰今年以來不
雨者百餘日盜賊不敢起考之史十九
年自正月至七月不雨是公官滿上書
當在是年秋冬之交也蓋公在御史位
之日甚淺進學解云暫爲御史遂竄南
夷又縣齋詩曰雖陪彤庭臣詎縱青冥
靶皆可考也使公果由博士遷御史固
不應稱前官亦不應尚以此書佞李實

也其初除爲十七年無疑矣况議禘祫
狀亦在十七年自足參究洪以公縣齋
有懷詩兩府變荒涼三年就休假謂自
十六年至十八年故以除官在今年又
以荅張徹詩省選逮投足亦在今年按
三年就休假蓋統十五年而言也公是
年二月去汴及秋方從張建封之辟是
亦可以休假言也公十八年首春即以
一書薦十士於陸倕二月陸出刺歙公
送行有序考其辭意蓋皆已仕于朝也

況公明年上陳京書云去年春嘗得一
進謁其後如東京取妻子是公在春末
已謁告挈家矣豈可尚以休假言也省
選逮投足亦十六年冬求官去東洛之
日也不應公再到京而後參選也公是
夏西還遂登華山古意詩唐本云五月
壁路難攀援乃此時也公來歲未貶陽
山之前初未嘗出京也樊又以為登華
山在十六年蓋泥於犯雪過西華之語
然是時公方求官寧復謁告其考益踈

矣

李肇國史補云愈好奇與客登華山絕峯度
不可返發狂慟哭為書與家人別華陰令百
計取之乃下沈顏作贅書以為肇妄載豈有
賢者輕命如此考公詩則知國史補乃實錄
也

按沈顏作登華言其略曰仲尼悲麟悲
不在麟也墨翟泣絲泣不在絲也且阮
籍縱車於途途窮輒哭豈始慮不至耶
蓋假事諷時致意於此爾文公憤趨榮

韓詩四
貪位者若陟懸崖險不能已至顛危踣
蹶然後歎不知稅駕之所焉可及矣原
沈之意似與洪所引異也

是年有施士丐墓誌馬彙行狀

十九年癸未拜監察御史冬貶連州陽山令

去年與崔羣書云左車第二牙無故動搖脫
去而齒落詩云去年落一牙則此詩今年作
也哭楊兵曹凝陸歙州儉云人皆期七十纔
半豈蹉跎數出知己淚自然白髮多公今年
三十六矣李翱云儉貞元十八年四月以祠

部員外郎出刺歙卒于道柳宗元云凝守兵
部郎中貞元十九年正月卒哭二公詩在今
春也疑為兵部而云兵曹者隋嘗改兵部為
兵曹禮部為儀曹也禘祫議云今月十六日
將仕郎守國子監四門博士臣韓愈獻議按
史云十九年三月丁卯以今年孟夏禘饗前
議太祖懿獻之位未決至此禘祭方正太祖
東向之位已下列序昭穆其獻祖祔于德明
興聖之廟每禘祫年就本室饗之則議禘祫
在今春也

韓詩曰
禘祫議當在十七年已辨於歷官記矣
況初議之日陳京以考功員外郎與公
同議及今年陳已再遷給事中矣益信
公除博士之果在十七年也洪只以禘
在今年而不考始議非今年也詳見前
論今年權停選舉狀云伏見今月十日勅今
年諸色選舉宜權停者按史云十九年秋七
月以關輔饑罷吏部選禮部貢舉則議舉選
在今秋也上李實尚書書稱前守四門博士
時已罷博士未受御史之命書云愈來京師

於今十五年自貞元五年公復來京師至此
十五年矣順宗實錄云是時春夏旱京畿乏
食實一不以介意方務聚斂徵求以給進奉
勇於殺害人吏不聊生書云今年已來種不
入土而盜賊不敢起穀價不敢貴老姦宿賊
銷縮摧沮稱其所長止此而已自博士拜監
察御史是時有詔以旱饑蠲租之半有司徵
愈急公與張署李方叔上疏言關中天下根
本民急如是請寬民徭而免田租之弊天子
惻然卒為幸臣所讒貶連州陽山令幸臣李

實也進學解云暫為御史遂竄南夷祭張署
文云貞元十九君為御史余以無能同詔並
峙余贛而狂年未三紀明年而三紀周矣又
云我落陽山以尹鼯猱歲弊寒兇雪虐風號
縣齋有懷云捐軀辰在丁鍛翻時方禘禘祭十
二月也辰在丁其奏疏之日乎史云公上章
數千言論宮市德宗怒貶陽山令疏令不傳
寄三翰林詩云拜疏移閣門為忠寧自謀天
子惻然感司空歎綢繆謂言即施設乃返遷
炎洲公之被絀坐論此兩事也司空即杜佑

是年拜檢校司空同中書門下平章事又云
同官盡才俊偏善柳與劉或慮語言泄傳之
落冤讎宗元禹錫與公同為御史劉柳方進
用則公被絀宜矣岳陽樓別竇司直云愛才
不擇行觸事得讒謗永貞行云吾嘗同僚情
可勝皆謂劉柳也

按公陽山之貶寄贈三學士詩敘述甚
詳而皇甫持正作公神道碑亦云因疏
關中旱饑專政者惡之則其非為論宮
市明矣今公集有御史臺論天旱人饑

狀與詩正合况皇甫持正從公遊者不
應公嘗疏宮市而不及之也然公寄三
學士詩尚云或自疑上疏上疏豈其由
則是又未必皆上疏之罪也又曰同官
盡才俊偏善柳與劉或慮言語泄傳之
落冤讎又岳陽樓詩云前年出官由此
禍最無妄茲猜畏彈射斥逐恣欺誑是
蓋為王叔文韋執誼等所排矣德宗晚
年韋王之黨已成韋執誼以恩幸時時
召見問外事貞元十九年補闕張正買

疏諫他事得召見與正買相善者數人
皆往賀之王叔文韋執誼疑其言己朋
黨事誣以朋讎盡譴斥之意公之出有
類此也故公寄三學士詩云前日遇恩
赦私心喜還憂果然又羈縶不得歸耜
耜蓋是時叔文之黨尚熾也又憶昨行
云佞文未崩崖州熾雖得赦宥常愁猜
是其為王叔文等所排豈不明甚特無
所歸咎駕其罪於上疏耳洪謂公之被
絀坐論宮市與旱饑兩事兼而言之而

又不考韋王始末故爲申及之

又云商山季冬月冰凍絕行輶春風洞庭浪
出沒驚孤舟答張徹云疊雪走商嶺飛波航
洞庭蓋公以冬末貶官明年春始到陽山也
祭李郴州云當貞元之癸酉愴皇威而左授
當作癸未別知賦云歲癸未而遷逐是也公
在陽山有惠在民百姓多以公之姓命其子
是年有苗氏墓誌

二十年甲申

祭張署云余唱君和百篇在吟署有詩云九

疑峯畔二江前戀闕思鄉日抵年白簡趨朝
曾並命蒼梧左官亦聯翩鮫人遠泛漁舟火
鵬鳥閑飛霧裏天渙汗幾時流率土扁舟西
下共歸田公和詩即吟君詩罷看雙鬢院覺
霜毛一半加者同冠峽詩云南方二月半春
物亦已少知公今春到陽山矣別知賦送楊
儀之云余取友於天下將歲行之兩周自建
中初避地江南至此二十餘年又有送楊八
弟支使歸湖南使府序即儀之也送區冊序
云愈待罪於斯且半歲矣有區生者自南海

擊舟而來與竇存亮書云今乃乘不測之川
入無人之地以相從問文章為事劉生詩云
陽山窮邑惟猿猴手持釣竿遠相投三子者
能從公于彼其志亦可尚矣祭署文云我落
陽山君飄臨武君止於縣我又南踰臨武屬
郴州在陽山之北憶昨云陽山鳥路出臨武
是也又云期宿界上一夕相語僕來告言虎
入廐處無敢驚逐以我驟去君云是物不駿
於乘虎取而往來寅其徵我預在此與君俱
膺猛獸果信惡禱而憑二公以今秋冬期宿

界上明年正月遇赦既而俱徙掾江陵也公
在連州有王弘中燕喜亭記

韓文類譜卷第四

雖正弓西八月水珍
瓊山朝依席本枝物

韓文類譜卷第五

韓子年譜

起永貞元年止元和五年

丹陽洪

興祖慶善

順宗

永貞元年乙酉移江陵法曹參軍

呂云二十一年甲申移

江陵掾以四門博士召非是

順宗實錄貞元二十一年正月丙申上即位

二月甲子大赦八月辛丑改永貞元年縣齋

有懷云嗣皇新繼明即此年也張署墓誌云

與同輩韓愈李方叔俱為縣令南方二年俱

徙掾江陵杏花詩云二年流竄出嶺外二年

謂甲申乙酉送文暢詩云三年竄荒嶺通癸
未歲也送區弘云我遷于南日周圍謂七年
春到陽山今春遇赦日一周天也河南同官
記曰永貞元年自陽山移江陵法曹蓋公今
春遇赦夏秋離陽山俟命於郴者三月其受
命在秋末也祭李郴州云俟新命於衡陽費
薪芻於館候輟行謀於俄頃見秋月之三穀
逮天書之下降猶低回以宿留郴在衡山之
南故曰衡陽自郴至衡有合江亭寄刺史鄒
君詩云維昔經營初邦君實王佐注云此亭

故相齊公映作蓋映罷相後自夔移衡也窮秋
感平分新月憐半破時月未望也祭張署云
衡陽放酒熊咆虎嘯不存令章罰筭蝟毛委
舟湘流往觀南岳公有謁衡岳廟遂宿岳寺
題門樓詩云我來正逢秋雨節陰氣晦昧無
清風自衡至潭陪杜侍御遊湘西寺獨宿有
題云是時秋初殘暑氣尚未斂時月向晦矣
自此泛洞庭阻風贈張十一云十月陰氣盛
北風無時休即祭文云避風太湖七日鹿角
者既至岳州別竇司直于岳陽樓云朝迴宜

春口宜春袁州夜纜巴陵洲巴陵岳州也竇
 庠字胄卿時以武昌幕大理司直權知岳州
 劉夢得賡韓侍御岳陽樓詩云假守亦高卧
 墨曹正垂耳契闊話温涼壺觴慰遷徙北史
 裴訥之為平原公墨曹掌書記通典云司法
 參軍或謂之法曹或謂之墨曹又云故人南
 臺舊一別如弦矢今朝會荆蠻斗酒相宴喜
 劉與退之嘗同官此詩即夢得貶官過江陵
 所作也 初公在郴時八月十五日夜贈張
 功曹云昨者州前搥大鼓嗣皇繼聖登夔臯
 赦書一日行萬里罪從大辟皆除徙遷者追
 迴流者還滌瑕蕩垢清朝班州家申名使家
 抑坎軻祗得移荆蠻是年八月憲宗受禪公
 兩遇赦矣

按是年八月五日憲宗即位此十五日
 詩也所謂嗣皇繼聖登夔臯及州家申
 名使家抑只謂順宗赦也別本昨者作
 昨日然使家抑之言恐不緣再赦也

又赴江陵塗中有寄贈王二十補闕李十一
 拾遺李二十六負外翰林三學士詩諱行錄

云王二十涯李十一建李二十六程也詩云
昨者京使至嗣皇傳冕旒赫然下明詔首罪
誅共兇謂貶王伾王叔文也永貞行云太皇
諒陰未出令謂順宗即位時嗣皇卓犖信英
主謂憲宗也又云郎官清要為世稱荒郡迫
野嗟可矜時柳宗元自禮部貶外貶召州刺
史劉禹錫自屯田貶外貶連州刺史柳再貶
永州司馬劉再貶朗州司馬皆坐交文叔也具
書目見非妄徵蓋公嘗謫陽山故也 送孟
瑄秀才序云今年秋見孟氏子於郴其十月

吾道於衡潭以之荆孟瑄元和五年進士見
鴈塔題名嘗著嶺南異物志荆潭唱和詩序
云僕射公開鎮荆蠻統郡惟九常侍楊公領
湖南之壤地二千里僕射裴均常侍楊憑也
憑以是年冬自湖南移江西裴均事見河南
同官記 十二月上李巽侍郎書云應舉見
官二十年矣自貞元二年至今二十年又云
南行詩一卷即所謂百篇在吟者 五箴云
幕中之辨謂在徐州時臺中之評謂為御史
時序云余生三十有八年即此年也一作四

十八按十八年與崔羣書云左車第二牙脫去兩鬢半白頭髮五分亦白其一祭老成云吾年未四十而視茫茫而髮蒼蒼而齒牙搖動自今年來蒼蒼者或化而為白矣動搖者或脫而落矣此云髮之短者日益白齒之搖者日益落明年感春云冠欹感髮禿語誤悲齒墮以此觀之公未四十時屢有此歎知作四十八為誤也 是年有鄭夫人殯表

憲宗

元和元年丙戌夏召為國子博士

順宗實錄云永貞二年丙戌正月丙寅朔韓

本作正月丙戌朔誤矣是年正月改元和元年蓋憲宗即位之踰年也和張十一憶昨行云憶昨夾鍾之呂初吹灰杜公禮罷元侯迴杜佑貞元十九年春自淮南節度入朝拜檢校司空也

杜公古本作社公公時任江陵法曹元侯謂帥裴均也言裴均罷社而享客故其下謂車載牲牢甕舁酒並召賓客延鄒枚其義甚明洪誤矣

任文未揃崖州熾憲宗即位始貶韋執誼為

崖州司戶故也有李花云祇今四十已如此
時年三十九寒食出游夜歸贈張十一云念
君又署南荒吏署墓誌云徙掾江陵半歲邕
管奏君為判官不行又云明宵固欲相就醉
有月莫愁當火令時春末夏初也

此寒食詩也謂禁火也魏武帝有寒食
禁火明罰令非謂夏初也東坡嘗為李
公擇書此詩又作有月莫辭燈火冷不
知當時所據何本也

鄭羣贈簞唐本注羣時以殿中侍御史佐江

陵軍◎釋言云元年六月自江陵召拜國子
博士請復國子監生徒狀云今聖道大明儒
風復振當在此年

狀當從歷官記以附長慶元年

荅張徹云赦行五百里月變三十冀漸階羣
振鷺入學誨螟蛉自十九年冬謫陽山至今
夏召還積三十月矣豐陵行是年七月葬順
宗于豐陵游青龍寺贈崔大羣補闕云秋灰
初吹季月管是年九月也贈崔立之評事云
復聞王師西討蜀霜風冽冽摧朝菌伐劉闢

在今春平蜀在今秋故征蜀聯句曰始去杏
飛蜂及來柳嘶蜚秋兩聯句亦云因思征蜀
士未免濕戎旆也城南聯句云驅明出庠黌
會合云天居覲清拱納涼云今來沐新恩同
宿云生榮今分踰諸聯句皆還朝後作 送
文暢北遊云昔在四門館晨有僧來謁謂貞
元十九年爲四門博士時昨來得京官謂今
年被召照壁喜見蝎甚言北歸之樂也僕射
領北門謂田季安相公鎮幽都謂劉濟 是
年有祭十二兄岌文并墓誌

二年丁亥分教東都生

元和聖德詩序云外斬楊惠琳劉闢以收夏
蜀東定青徐積年之叛郊天告廟神靈歡喜
謂元年楊惠琳據夏州叛三月辛巳夏州兵
馬使張承金斬惠琳傳首以獻九月辛亥高
崇文奏收成都擒劉闢以獻十月壬午淄青
李師道十一月戊申武寧張愔皆受命二年
正月己丑朔上親獻太清宮太廟辛卯祀昊
天上帝于郊丘是日還宮御丹鳳樓大赦天
下先是將及大禮陰晦浹辰享獻之辰景物

晴霽人情忻悅序列二年事詩云正月元日
謂此年是也 四門博士周况妻韓氏墓誌
云開封尉俞之女開封卒從父弟愈於時爲
博士乞分教東都生以收其孥於開封界中
教畜之李翱云權知國子博士宰相有愛公
文者將以文學職處公有爭先者爲飛語公
恐及難遂求分司東都釋言云拜國子博士
始進見今相國鄭公後數日有來謂愈有讒
子於相國者旣累月又有來謂愈曰有讒子
於翰林舍人李公與裴公者旣累月上命李

公相客謂愈曰子前被言於一相今李公又
相子其危矣公分教東都生正以避謗爾元
年相國鄭餘慶鄭絀公爲國子博士在去年
六月時餘慶已罷相又云吾見子某詩吾時
在翰林職親而地禁不敢相聞鄭絀德宗時
爲翰林學士累遷中書舍人憲宗即位爲中
書侍郎同平章事公所見鄭公即絀也去年
十二月李吉甫裴均皆爲翰林學士中書舍
人李即吉甫裴即均也今年正月己酉吉甫
爲中書侍郎同平章事李公又相即吉甫也

公初被召見鄭公後數日即有讒公者既累月又讒於裴李既累月李公又相釋言之作在今春矣分司東都在今年但不知何月耳公與馮宿書曰僕在京城一年又是歲之秋已有酬裴十六巡府西驛途中見寄詩是秋日已在東都矣疑只夏末出京也

是年有盧東美苗蕃盧於陵墓誌

三年戊子

酬崔十六少府詩唐本注云元和三年詩云

三年國子師公自元年為博士至今三年行狀云權知三年改真博士也東都遇春云幸蒙東都官獲離機與竇謂避謗分司也與少室山人李渤拾遺書云十二月某日伏承天恩詔河南敦諭拾遺公方今天子仁聖自即大位以來於今四年憲宗永貞元年即位至今四年也唐史紀傳皆云元和元年詔以左拾遺召不赴寄玉川子詩云少室山人索價高兩以諫官徵不起則元年三年皆被徵公遺以書渤善其言乃出家東都至九年始應

著作之命也新史云洛陽令韓愈遺渤書公是時為博士五年方為河南令未嘗為洛陽令也

四年己丑改都官員外郎守東都省

李翱來南錄云元和三年十月受嶺南尚書公之命四年正月去東都韓退之石濬川假舟送予到景雲山居詰朝登上方南望高山題名姓紀別送翱詩云廣州萬里途山重江透迤時揚於陵節度嶺南辟翱為幕府也又云雖云有追送足跡絕自茲謂送至景雲山

居而別也

歐公云退之題名二皆在洛陽

其一在嵩山天封宮其一在福先寺塔下嵩山題名云四年三月二十六日與著作佐郎樊宗師處士盧同自洛中至少室謁李徵君渤樊次玉泉寺疾作歸明日遂與李盧道士韋濛僧榮並少室而東抵衆寺上太室中峯宿封禪壇下石室遂自龍泉寺釣龍潭水遇雷明日觀啓母石入此觀與道士趙玄遇乃歸閏月三日國子博士韓愈題

福先塔下題名乃去歲之十月十九日

韓詩五
時同遊者七人然非公親題也公今年
九月復嘗與同僚迓杜兼于郊亦有題
名時公已為都官郎矣題名云河南尹
水陸運使杜兼尚書都官員外郎韓愈
水陸運判官洛陽縣尉李宗閔水陸運
判官伊闕縣尉牛僧孺前同州韓城縣
尉鄭伯義元和四年九月二十三日大
尹給事奉詔祠濟瀆回愈與二判官於
此迎候遂陪遊宿愈題公題名今之可
見於世者三題名之外又有從晉公東

征華岳題名洛北惠林寺釣魚題名同
李翱孟郊柳宗元石弘登慈恩塔題名
同樊宗師盧仝謁少室李拾遺題名皆
可參究聊併及之

祭薛公達云四年己丑後三月二十一日丙
寅朝散郎守國子博士韓某而墓誌云朝議
郎墓誌在祭文後也 皇甫湜云除尚書都
官郎中分司判祠部新舊史行狀皆云都官
員外郎送李正字序云以都官郎守東都省
是也中官號功德使司京城觀寺尚書斂手

失職愈按六典盡索之以歸日與官者為敵
公除都官六月十日也時實以負外郎
分司東都神道碑謂郎中誤矣初除制
辭云朝議郎守國子博士分司東都上
騎都尉韓愈直亮而廉潔博達而沈厚
守經嗜學遂探其奧希古為文故得其
精美宋玉之微辭尚楊雄之奇字為己
求道暗然揚聲可行尚書都官負外郎
分司東都王仲舒詞也

送侯叅謀赴河中幕云幸同學省官末路再

得朋侯繼同年進士時為太學助教同在東
都見祭薛助教文又云洸洸司徒公天子爪
與肱三年九月王鏐為檢校司徒河中節度
使司徒公即鏐也河北兵始進蔡州帥新薨
謂今年十月討王承宗十一月蔡州吳少誠
死明年感春云王師北討何當迴蔡州納節
舊將死謂此也 和虞部盧四汀酬翰林錢
七徽赤藤杖歌唐本云元和四年分司郎官
錢徽字蔚章盧汀字雲夫 是年有裴稷京
兆韋氏夫人墓誌河南府同官記

公有裴復墓誌非稷也復父虬嘗爲道
州刺史有怡亭銘歐公集古錄云退之
嘗爲其子復墓誌者此也復亦卒葬於
三年非四年也

五年庚寅爲河南縣令

感春詩云起居諫議聯翩來謂裴度自河南
功曹遷起居舍人孟簡等爲諫議大夫也又
云前隨杜尹拜表回笑言溢口何歡哈孔丞
別我適臨汝風骨峭峭遺塵埃音容不接祇
隔夜凶訃詎可相尋來杜兼爲河南尹四年

十一月暴薨孔殘爲衛尉丞分司東都五年
正月將浴臨汝之湯泉壬子至其縣食遂卒
見二人墓誌

裴度自河南府功曹從武元衡辟爲西
川節度掌書記自掌書記召入爲起居
郎洪謂自河南功曹遷誤也

上留守鄭餘慶啓云分司郎官職事唯祠部
爲煩且重愈獨判二年乞與諸郎官更判公
去年分司今二年矣 送鄭十涵校理序涵
餘慶之子改名澣貞元十三年進士憲宗所

謂卿之令子朕之直臣也序云愈爲博士也
始事相公於祭酒分教東都生也事相公於
東太學今爲郎於都官也又事相公居守三
爲屬吏經時五年按唐書宰相表永貞元年
八月尚書左丞鄭餘慶同平章事元和元年
十一月罷爲河南尹本傳云憲宗立拜平章
事未幾罷爲太子賓客改國子祭酒累遷吏
部尚書舊史云元年五月爲太子賓客九月
爲國子祭酒十一月爲河南尹河南志云二
年三月加兼知東都國子監事舊史又云三

年六月爲東都留守十月爲吏部尚書表不
載其爲賓客祭酒傳不載其爲河南尹東都
留守皆闕文也公以元年爲博士二年分教
東都生四年分司郎官迨今五年矣 送李
判官正字礎歸湖南序礎貞元十九年進士
仁鈞之子也序云貞元中愈從太傅隴西公
平汴州李生之尊父以侍御史管汴之鹽鐵
公薨軍亂軍司馬從事皆死侍御亦被讒爲
民日南其後五年愈又貶陽山令今愈以都
官郎守東都省侍御自衡州刺史爲親王府

長史亦留此掌其府事李生自湖南從事請
告來覲於時太傅府之士惟愈與河南司錄
周君巢獨存其外則李氏父子離十三年幸
而集處按汴州亂在貞元十五年其後五年
當貞元癸未公貶陽山也侍御之遷日南在
董晉死後自貞元己卯至今十二年而云十
三年豈退之與礎別在戊寅歲乎周君巢貞
元十一年進士柳子厚有與君巢書 五竇
聯珠云洛陽令竇牟陪韓院長韋河南同尋
劉尊師不遇得同字曰仙客誠難訪吾人豈

易同獨遊應駐景相顧且吟風藥畹瓊枝秀
齋軒粉壁空不題三五字何以達壺公都官
負外郎韓愈得尋字秦客何年駐仙源此地
深還隨躡鳧騎來訪馭風襟院閉青霞入松
高老鶴尋猶疑隱形坐敢起竊桃心河南縣
令韋執中得師字早尚逍遙境常懷汗漫期
星郎同訪道羽客杳何之物外求仙侶人間
得我師不知爛柯者何處看圍碁公詩集中
不載是詩以同尋師為韻亦古人分韻之例
也竇牟墓誌云元和五年真拜尚書虞部郎

中轉洛陽令祭文云分宰河洛愧立並躬尋
劉尊師時竇為洛陽令公為郎官其後乃分
宰河洛也 為河南令上留守鄭公啓云今
雖蒙沙汰為縣猶在相公治下又云守官去
官惟今日指揮則公以論事失鄭公意既令
河南猶論列不已行狀云改河南令日以職
分辨於留守及尹故軍士莫敢犯禁 燕河
南秀才云元和五年冬房公尹東京房式四
年十二月為河南尹洛陽在唐為東都故有
留守有尹留守之官居禁省中歲時出旌旗

叙留司文武百官於宮城門外而衙之見河
南府同官記又云昨聞詔書下權公作邦楨
是年秋德輿拜相也 月蝕詩効玉川作玉
川云新天子即位五年公云元和庚寅斗插
子即今年十一月也新史云全作此詩以譏
切元和逆黨按憲宗之崩在十五年新史誤
矣

江子我云元和五年時杜佑裴均李藩
權德輿為平章事其他在朝類多賢俊
獨假宦官權太盛又往往出於閩嶺玉

川詩云才從海窟來便解緣青眞蓋專
譏刺官官也按玉川此詩固不爲無意
史臣只合以譏刺官者言之必預指之
爲元和逆黨所以不免後世之議

是年有張圓墓碣盧殷墓誌 公在河南有
招楊之果及河南令舍池臺詩

志道云有軍人有罪愈追而問之不時至
怒杖之軍吏入告留守留守不察愈上書
決去就當是神策軍

韓文類譜卷第五

離正云西八四小玲
瓏山韻依宋本校

車言三

